

**Sud Bosne i Hercegovine**  
**Суд Босне и Херцеговине**

---

**Broj: S1 3 P 038086 20 Iž**  
**Sarajevo, 26.10.2020. godine**

*Sud Bosne i Hercegovine, u drugostepenom vijeću sastavljenom od sudija Srete Crnjaka kao predsjednika vijeća, Vesne Trifunović i Dinke Bešlagić Čovrk kao članova vijeća, odlučujući o žalbi 1.Borisa Mrđa sa boravkom u Srbiji 11211 Borča ul. Radomira Stevića Rasa br.1, 2.Jovanke Galonja sa boravkom u Srbiji 21203 Veternik ul. Milana Tepića br. 14, 3.Željane Latinović Nikić sa boravkom u Srbiji 21413 Čelarevo ul. Sonje Marinković br. 44, 4.Ljiljane Radanović sa boravkom u Srbiji 11000 Beograd ul. Kneza Višeslava br. 82 i 5.Bore Tešanovića sa boravkom u Srbiji 24000 Subotica ul. Beogradski put 103/39, koji osporavaju odluku Centralne izborne komisije BiH broj 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 26.10.2020. godine, donio je*

**RJEŠENJE**

*Žalba se odbija.*

**Obrazloženje**

*Odlukom Centralne izborne komisije Bosne i Hercegovine broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020 .godine po podnesenim prijavama do 01.09.2020.godine jer nisu ispunjeni uslovi propisani odredbom člana 3.15 stav 1, 2 i 3 Izbornog zakona Bosne i Hercegovine.*

*Navedenom odlukom odbijena je prijava Borisa Mrđe, Jovane Galonja, Željane Latinović, Ljiljane Radanović i Bore Tešanovića koji su blagovremeno izjavili žalbu u kojoj su naveli da su uz prijavu za glasanje putem pošte dostavili važeće lične karte iz Srbije.*

*Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana jer je*

žalitelji uz prijavu za glasanje izvan BiH nisu dostavili zakonom propisani dokaz o identitetu.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Pravilna je i zakonita odluke Centralne izborne komisije BiH kojom je odbijena prijava žalitelja za upis u izvod iz Centralnog biračkog spisa za glasanje izvan Bosne i Hercegovine jer imenovani uz prijavu nisu dostavili važeći identifikacioni dokument. Time nisu ispunjeni uslovi propisani članom 3.15. stav 1 Izbornog zakona (Sl. glasnik BiH br.23/01 sa izmjenama) da se državljanin Bosne i Hercegovine koji privremeno živi u inostranstvu, nađe na izvodu Centralnog biračkog spiska za glasanje van zemlje budući da član 5.12 stav 4 istog zakona propisuje da je važeća lična isprava za birače, lična karta, pasoš i vozačka dozvola izdata u Bosni i Hercegovini.

Centralna izborna komisija Bosne i Hercegovine u osporavanom rješenju pravilno je utvrdila činjenicu da žalitelji uz prijavu za glasnja izvan BiH nisu dostavili ni jedan važeći zakonom propisani dokument o identitetu. Uz prijavu priložena lična karta izdata u Srbiji, kao i uvjerenje o državljanstvu Bosne Hercegovine ne smatra se dokazom o identitetu predviđen Izbornim zakonom, te je prilikom odlučivanja CiK BiH pravilno primjenio zakonsku odredbu koja propisuje uslove za prihvatanje prijave za glasanje van BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA**  
**SUDIJA**  
**Sreto Crnjak**